



Inatsisartunut ilaasortaq  
Randi Vestergaard Evaldsen  
Demokraatit

**Meeqqanut inuusuttunullu suliassaqrarfiup nakkutigineqarneranut tunngatillugu § 37 naapertorlugu apeqqummut nr. 2017 -161-imut akissut:**

29-06-2017  
Suliap nr.: 2017 - 13945  
Takussutissiaq id. 5640872

Asasara Randi Vestergaard Evaldsen

Meeqqanut inuusuttunullu suliassaqrarfiup nakkutigineranut tunngatillugu apeqqutinnut qujanaq. Akissutigita tullinnguuttuni takuneqarsinnaavoq.

Postboks 260  
3900 Nuuk  
Oqarasuaat (+299) 34 50 00  
Naqitanik nassitsigasuaat +299  
34 66 66  
Mail: iniian@nanoq.gl  
www.naalakkersuisut.gl

**1. Naalakkersuisut qanoq iliulersaarpat qularnaarniarlugu, Kommuneqarfik Sermersuumi meeqqat pillugit sullissinnermi inunnik isumaginninnermut malittarisassat aqunneqarneri pillugit nakkutilliinnermut nalunaarusiap kapitel 5-ani atuarneqarsinnaasut innersuussinerit eqqunneqarnissaat taamatullu kommunini tamani atortussanngortinneqarnissaat?**

Inunnik isumaginninnermut inatsisini malittarisassanik kommunit aqutsinerisa ataavartumik sunniuteqarluartumillu immikkoortumik nakkutiginnissaat qulakkeerniarlugu Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoqarfimmi Nakkutilliinnermik ingerlatsivimmik nammineq sulisussamik 1. januar 2016-miit pilersitsisoqarpoq.

Isumaginninnikkut immikkoortumik nakkutilliinissami ilaatigut makku sularinissaat siunertarineqarpoq: 1) Aaqqissuulluakkamik, assigiissumik, kimulluunniit attuumassuteqanngitsumik suliatigullu tunngavissalimmik nakkutilliisoqassasoq, 2) Kommuninut attuumassuteqartunut tunngatillugu nakkutilliinnermi nalunaarusiamik tusarniaanissamat periarfissalimmik suliaqartarnissaq kiisalu 3) Aaqqissuulluakkamik malitseqartitsiarnissaq.

Aaqqissuulluakkamik malitseqartitsinissamat tunngatillugu taaneqassaaq kommunit pineqartut nakkutilliartornermi nalunaarusiap kommuninut nassiunnerata kingorna qaammatit arfinillit iluanni allakkatigut nassuiaammik nassiusaqartalissammata, tassani kommunip inatsisunik kukkusumik paasinissimanerminik aamma sularianik suliaqarnermi kukkusoqarsimanerminik sutigut iluarsiiarnerminik nakkutilliinnermut ingerlatsivimmik nassuiaateqartalissallutik. Tamanna Isumaginninnermut tunngasunik nakkutilliineq pillugu Namminersornerullutik Oqartussat nalunaarutaanni nr. 6, 16. februar 2006-imeersumi § 5, imm. 2-mi takuneqarsinnaavoq.

Nalunaarummi takuneqarsinnaavortaaq immikkoortumik nakkutilliinermi nalunaarusiaq naammassisaq kommunimut pineqartumut aamma kommuninut Nakkutilliisoqarfimmut nassiunneqassasoq.

Ilanngullugu apeqqutigineqartumut tunngatillugu paasissutissiissutigineqassaaq immikkoortumik nakkutilliinermi nalunaarusiat naammassiat - meeqqanut inuusuttunullu suliassaqrarfiup suliniuteqarfigineranut tunngatillugu - tamatigit kommuninut attuumassuteqartunut ataasiakkaanut innersuussutinik arlalinnik naggaserneqartassasut, innersuussutillu tamakku kommunimiit kommunimut assigiinngitsuusinnaapput, matumani kommunini ataasiakkaani nakkutilliinerup qanoq inerneqarsimanera apeqqutaalluni.

**2. Naalackersuisut sulissutiginiarnerlugu nuna tamakkerlugu qarasaasiami paasissutissanik katersuiveqalernissaa, atorneqarsinnaasussamik politiinit, Atuarfinit, Peqqinnissaqarfinit Atuarfinnillu taamaaliornikkut qularnaarumallugu, pisortat oqartussaaffiisa assersuutigalugu sumiginnaasoqarsimanera pillugu suliamik aallartitsisoqartillugu, pisariitsumik sukkasuumillu suliaq pillugu allattugaatinik takusarsinnaanissaat?**

Meeqqat tapersersorneqarnissaannut Inatsisartut inatsisaat nr. xx, xx. xx 2017-imeersoq qanittumi akuersissutigineqartoq naapertorlugu § 51-imi takuneqarsinnaavoq:

*"Atuarfik, atuareernermi ornittagaq, napparsimasunik paarsisut, peqqissaasut, nakorsat, kigutit nakorsaat kigutigissaasullu kommunip peqqissaaviani atorfeqartut, ulluunerani neqeroorutit, sunngiffimmi ornittagaq oqartussaasullu meeqqanik atugarliortunik sullissinerup iluani suliassanik suliaqartartuusut meeqqap inuttut ilaqttaminilu atugarisai, inummut namminerlut tunngalluinnartut pillugit paasissutissat akunnerminni paasissutissiissutigisinnaavaat, paasissutisseeqatigiinneq meeqqat atugarliortut pillugit siusissukkut pinaveersaartitsiniarluniluunniit suleqatigiinnermut atatillugu pisariaqartuusorineqarpat"*

Taamatuttaa § 52-imi takuneqarsinnaavoq:

*"Kommunini oqartussaasut meeqqanik inuusuttunillu atugarliortunik sullissinerup iluani suliassanik isumaginnittuusut politiinut unnerluussisussaataasunullu meeqqap inuttut ilaqttaminilu atugarisai, inummut namminerlut tunngalluinnartut, pillugit paasissutissanik ingerlatitseqqiisinnaapput, ingerlatitseqqiinneq meeqqat naapertuilluannngitsuliorfigineqarnissaannik pinaveersaartitsinerlut atatillugu pisariaqarsorineqarpat"*.

Taamaalillunilu pisariaqartinneqarpat ingerlatsiviit attuumassuteqartut paasissutissanik attuumassuteqartunik namminerlu paasissutissaatigisanik avitseqatigiissinnaanerut periarfissaavoq.

Pisortanili oqartussaasut akimorlugit paasissutissanik ataatsimut paarlaasseqatigiittarneq ilaatigit Pisortat ingerlatsineranni suliat suliarineqartarnerat pillugu Inatsisartut inatsisaannik nr. 8, 13. juni 1994-imeersumik akerliusutut nalilernerqarpoq, tassanimi § 28-imi ingerlatsiviit akornanni paasissutissanik inummut tunngassutilinnik paarlaasseqatigiittarnermut malittarisassat aalajangersagaammata. Tassanilu takuneqarsinnaavoq ingerlatsiviit akimorlugit paasissutissanik paarlaasseqatigiinnermik pisoqartillugu tamatigit immikkut aalajangiisoqartarnissaa pisariaqartoq.

**3. Naalackersuisut qanoq iliorpat qularnaarumallugu, meeqqanik sumiginnaasoqarsimanera pillugu allattugaatik "tammaannartannginnissaat" ilaqtariit kommunimiit kommunimut allamut nuussimatillugit?**

Meeqqat tapersorsorneqarnissaannut Inatsisartut inatsisaanni nr. xx, xx. xx 2017-imeersumi qanittumi akuersissutigineqartumi aalajangersakkamik ilanngussisoqarsimavoq, tassanilu § 17-imi kommunit akunnerminni nalunaartartussaataanerit pineqarpoq. Imalu allassimavoq:

*"Ilaqtariit 18-it inorlugit ukiulimmik meerallit kommunimiit kommunimut allamut nuuppata, meerarluk immikkut ikiorserneqarnissamik pisariaqartitsisutut kommunip qimanneqartup isumaqarfiguniuk, tamanna pillugu kommune qimanneqartoq kommunimut nuuffigineqartumut allaganngorlugu nalunaaruteqassaaq.*

*Imm. 2. Ernisoqarnissaa sioqqullugu imaluunniit ernisoqareernerata kingorna angajoqqaanngortussat ikiorserneqarnissaannik pisariaqartitsisutut naliliiffigineqarpata, kommune qimanneqartoq imm. 1 malillugu taamaaqataanik nalunaaruteqarnissamut pisussaaffeqarpoq.*

*Imm. 3. Imm. 1 imaluunniit 2 malillugit nalunaaruteqarnermut atatillugu, suliami atortut attuumassuteqartut kommunip qimanneqartup nassiutissavai, tassunga ilanngullugit kommunip qimanneqartup naliliinerminut tunngavigisimasai paasissutissat attuumassuteqartut eqikkarneri.*

*Imm. 4. Ilaqtariit 18-it inorlugit ukiulimmik meerartallit imaluunniit angajoqqaanngortussat kommunimut Kalaallit Nunaata avataaniittumut nuuppata, imm. 1-3 taamatuttaaq atuutissapput.*

**4. Naalackersuisut oqaatigisinnaanerlugu pineqartumut tunngatillugu suliniutinik attuumassutilinnik siunissami qaninnermi aallartitsinissaminnut pilersaaruteqarnerlutik?**

Qanittukkut Meeqqat tapersorsorneqarnissaannut Inatsisartut inatsisaat nr. xx, xx. xx 2017-imeersoq akuersissutigineqartoq aalajangersakkanik arlalinnik meeqqat inuusuttullu illersorneqarnissaannik ikiorserneqarnissaannillu imaqarpoq, matumanilu meeqqat inuuniarnermikkut atugarliortut imaluunniit immikkut pisariaqartitallit immikkut pineqarlutik. Taamatuttaaq susasaqarfimmi anguniagaqarfiunerusumik suliniuteqartuqartarnissaa inatsisitigut qulakkearniarneqarpoq. Inatsisip nutaap taassuma atortussanngortinneqarnera piffissami aggersumi immikkut isiginiarneqassaaq. Ullunilu juunip 14-ianiit 16-ianut pikkorissartitsisoqarpoq, tassanilu sulianik ingerlatsisut pisortanilu atorfillit 160-inik amerlanerit meeqqat tapersorsorneqarnissaannut inatsimmik nutaamik erseqqissumik ilisimatinneqarput.

Nakkutilliinermik ingerlatsiviup suliatik aamma ingerlatiinnassavaat, inatsisillu malillugit takusaanerit nalaani tullermik takusaanissaaq pillugu eqqarsarnissamik pisussaaffeqarput kiisalu kalerreeqqaarani takusaasinnaaneq pisariaqartinneqassanersoq naliliiffigalugu. Nakkutilliinermik ingerlatsiviup ulloq unnuarluk angerlarsimaffinni pissutsinik ernumanarsinnaasunik paasisaqarsimagunik kommuninut meeqqanut ataasiakkaanut akisussaasunut nalunaaruteqassallutik pisussaaffeqarput.

Taamatutaaq Naalackersuisut sinnerlugit borgmesterit nutaat ataatsimiigiaqqusimavakka, ataatsimiinnermilu Isumaginninnermut Aqutsisoqarfiup nutaap qanoq ililluni taakku meeqqanut inuusuttunullu sullissinerannut pitsaanerpaamik ikorfartuisinnaanera eqqartorneqassaaq, qanorlu ililluta ataatsimoorluta meeqqanut inuusuttunullu suliassaqarfimmi unammilligassat qaangersinnaanerivut eqqartorneqassallutik. Taamaattumik pingaaruteqarpoq meeqqanut inuusuttunullu suliassaqarfimmi unammilligassanik qaangeeriarsinnaanitta kinguneqarluartumik oqaloqatigiissutigineqartarnerata ingerlatiinnarneqarnissaa.

Med venlig hilsen  
Inussiarnersumik inuulluaqqusillunga



Sara Olsvig  
Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut  
Naalackersuisoq